

02 MAY 1997

HUBUNGAN BAIK DENGAN BRITAIN AKAN BERTERUSAN, KATA ANWAR

KUALA LUMPUR, 2 Mei (Bernama) -- Malaysia percaya hubungannya yang sangat baik dengan Britain akan berterusan ekoran pemilihan Tony Blair sebagai Perdana Menteri baru negara itu, kata Timbalan Perdana Menteri Datuk Seri Anwar Ibrahim hari ini.

"Kita menyambut baik keputusan rakyat Britain itu," kata beliau pada persidangan media untuk mengumumkan nama Menteri Besar Selangor yang baru di pejabatnya di sini.

"Saya percaya Perdana Menteri Datuk Seri Dr Mahathir Mohamad mengharapkan untuk dapat segera bertemu dengan Perdana Menteri Tony Blair," kata beliau ketika diminta mengulas pemilihan pemimpin Parti Buruh itu pada pilihan raya umum Britain.

Dr Mahathir, kini dalam lawatan rasmi ke Afrika, dijadual melawat Britain lewat bulan ini untuk melakukan promosi bagi Koridor Raya Multimedia (MSC) yang akan diwujudkan di negara ini.

Anwar mengucapkan tahniah kepada Blair, 43, yang merupakan Perdana Menteri Britain yang paling muda dalam tempoh hampir 200 tahun.

Parti Buruh memenangi pilihan raya Britain dengan majoriti mutlak dalam Dewan Perwakilan yang mempunyai 659 kerusi itu, menewaskan dengan teruk Parti Konservatif yang memegang tampuk pemerintahan selama 18 tahun itu. --

BERNAMA

AZZ NMO